

duplo longioribus, tertio quarto vix vel paullo brevioribus; pronoto longitudine vix latiore, dense et fortiter impresso-punctato, angulo apicali magis minusve discreto, callis parvulis, nitentibus, apici appropinquatis, disco mox pone callos altissime tumido vel fere inflato-convexo, iterum ad marginem basalem declivi, parte inflatu structura variabili, lateribus versus apicem fortiter angustatis, basi quam apice circiter triplo latiore; hemielytris levibus opacis, locis sericeo-micantibus variegatis, embolio bene discreto, fractura cunei haud excisa, cuneo declivi, latitudini basali æque longo; coxis posticis ab epipleuris hemielytrorum remotis; pedibus breviusculis; femoribus posticis margine superiore usque ad medium sat convexis, dein in apicem usque subparallelis, tibiis muticis.

A genere præcedente capite verticali a latere viso brevioribus, angulo ejus faciali recto, antennis inferius positis, articulo earum tertio primo saltem duplo longiore, pronoti callis minutis discoque ejus postico adhuc multo altius convexo, fortius impresso-punctato, fractura cunei haud profunde excisa, etc., mox distinctus.

Hoc genus in subgenera duo sequentia divido :

1. **Physetonotus** mihi : fronte media foveola impressa; pronoto postice supra scutellum inflato-producto, æqualiter convexo, margine basali late rotundato; scutello vix visibili.

2. **Orinotus** mihi : fronte medio vix impressa sed lævigata; pronoto disco postico utrinque ad latera medioque longitrorsum impresso, versus marginem basalem perpendiculariter declivi, margine hoc truncato; scutello solum basi detecto.

7. **PHYSETONOTES (PHYSETONOTUS) ATRATUS** Dist., Biol. Centr.-Amer., Het., p. 285, 10, tab. XXVI, fig. 20 (*Eccritotarsus*). — Caracas.

8. **Physetonotus (Orinotus) Simoni**, n. sp. — Niger, nitidus, parcius tenuissime griseo-pubescentis, pronoto postice impressionibus minus profundis, gibbis inter eas parum altis obtusissime rotundatis; capite marginibus orbitalibus interioribus apiceque utrinque juxta clypeum testaceis; antennis, rostro, pedibus totis orificiisque metastethii albidis; hemielytris brevissime subseriatim flavicanti-puberulis, corio locis sericeo-cinerascentibus, embolio macula majore ante medium aliæque minore quadrangulari ante apicem nec non cuneo membranaque albidis, margine basali cunei anguste nigro; antennis articulo secundo latitudini capitis cum oculis longitudine subæquali, tertio secundo paullo longiore et quarto æque longo. — Long. 2 3/4 mill. — Caracas.